



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

31. Kalenderwoche – ab 01. August 2010

De Bahn im Sommerloch

Nee, de deutsche Bahn dud mir werglisch e bißl leid. Grade wo sisch das alljährliche Sommerloch ausbreidn un mid greeßdor Hidze dohm dud... wo sonsd nisch viel los in dor Bolledig... un ooch de Bundesliescha had noch Bause... wo sisch de Medjen off jede Schnabbschildgreede schderzn dädn, die irschendwo ausbichsn dud... odor off jedn Wandorwidz, dähr heehore Beidräsche von Digge fiehr de Kanknvorsicherung fordorn dud... - grade in dähr Zeid ham die bei dor Bahn e baar Broblehme mid ihre ICE-Ziesche! Das is doch werglisch gemeene!

De Glihmaanlachn ham vorsachd. Bei mindesdens zwee Ziesche! In die ICE`s, wo de kee Fensdor offmachn kannsd, isses da wie in dor Sauna gewähsn. Ohne Zuschlach!

Nascha, nee - da meschde isch ooch nisch grade mid von dor Bardie gewähsn sein! Un dass nu die, dies da erwischd had, e Schmärensgehd grischn, das is ogeh... - abor was kann denne de Bahn davor, wenn so eene Affnhidze is? Un dass bei so eenor Affnhidze ma eene Glihmaanlache ausschdeischn dud... das bassierd ehm! Desvorweeschn muss mor doch nisch de ganze Bahn zum Belzebubs schdembeln! Abor nee - alle Zeidung un ooch das Färnsähn - einhellisch un geschlossn droff off de Bahn! Wie als wärs widdor Rindorwahn!

Ährlisch, da wird jedzd sämdlischor Dregg, dähr sisch so angesammeld had iebor de ledzdn Monadde noch ma ausgegibbd un offgewirbeld!

Guhd, isch bin ja nisch grade eenor, dähr meend, dass mor de Deutsche Bahn schohnen missde -

nee, da duds schon einische Sachn gähm, wo se ordentlich Brieschl vordien dud, abor mor muss doch ooch ma de Girsche im Dorf lassn... beziehungsweise, de Logg im Schubbn!

Misch dud zum Beischbiel äherschorn, dass de Bahn nischd machn dud - so nach dähr aldn Dewiese:
Von dor Schdraße off de Schiene!

Es wird dauornd iebor dähn LKW-Vorkähr off dor Audobahn gejamord, dähr immor schlimmor wern dun dud, aber keenor machd was dageeschn! Keenor sachd, dass mor doch de Schienenweesche ham, odor ooch de Wassorweesche! Nee, da dud sisch keenor kimmorn! Odor ooch de Breisbolledig bei dor Bahn... odor das Nedz so in dor Brovinz... un un un!

Nee, jedzde wird droffgeschdroschn, weil e baar Glihmaanlachn dor Hidze nisch gewachsn warn!

Isch drigge dor Bahn ährlisch de Daum, dass schnellsdmeeschlich irschendwo was bassiern dud, was das Sommorloch e bißl ausfilln kennde. Damid sisch de Meide nisch noch mähr in de Bahn vorbeißn muss. Villeischd kennde eenor widdorma irschend e Vieh wegloofn lassn? Guhd, Schnabbschildgreedn un Gaimahne hadn mor schon gehabbd... villeischd had abor eenor e Nashorn daheeme, dassor ma nauslassn kennde? Odor e Schdinkdier... odor... villeischd kennde sisch ooch noch e Bollediggor offraffn? Roochvorbohd off Grienanlachn? Helmbflischd fiehr Bademeesdor...

Eduard Sachsenmeyer